



Inatsisartuni Ilaasortaq, Pele Broberg, Partii Naleraq
/maani

**Pisortat illuutaanni ikuallattumi putsumut kalerrisaarutit pillugit § 37
naapertorlugu apeqquateqammut 2019-358-imut akissut**

23-12-2019
Sags nr.: 2019 - 26516
Id nr. 48552741

Asasara Pele Broberg,

Inatsisartut suleriaasianni § 37 naapertorlugu pisortat illuutaanni ikuallattumi putsumut kalerrisaarutit pillugit Naalakkersuisunut apeqquateqateqarputit. Apeqqutitit uannit akineqartussat innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

1. Naalakkersuisut pilersaaruteqarpat ikuallattoornermi nalunaarutit (røgalarm) peqqussutinngornissaanut pisortat inissiaataani, Kollegiani imaluunniit suliffiini?

Akissut: Illuliornermut malittarisassat (IM2020) nutaat suliarineqarput, inissianilu nutaani, akunnittarfinni, ilinniartunullu inissiani putsumut kalerrisaarutit qaammaqutit aqutaannut ikkussuinissamik piumasaqaatit ilanngunneqassallutik. Illuutit pioreersut ukiuni sanaartorneqarfiini malittarisassat piumasaqaatillu atuuttut naapertorlugit sanaartorneqarmata, taamatut piumasaqaasiortoqarnissaanut tunngavissaqarnersoq tassunga ilanngullugu nalilersorneqarpoq.

Illuliornermut malittarisassanut siunnersuut tusarniutigineqareerpat, tusarniaaffigineqartullu oqaaseqaatigisinnaasaat ilanngunneqariarpata, malittarisassat piaartumik atuutsilersinneqarsinnaassasut naatsorsuutigaara.

2. Naalakkersuisut piumasaqaataangikkaluartoq piaarnerpaamik innuttaasut toqqissisimanissaat anguniarlugu kollegiani, pisortallu pigisaani allani, ikuallannermut nalunaarsuusersuinissaminnik (røgalarm) pilersaaruteqarpat?

Akissut: Ilinniartitaanermit, Kultureqarnermit, Ilageeqarnermullu Naalakkersuisoqarfiup paasissutissiissutigaa:

"Ilinniartunut inissiani tamani ikuallattumi putsumut kalerrisaarutit ikkussuisitsinissaq sulissutigalugu aallartineqareerpoq. Sumiiffinni ilinniagaqartut inissiaataannik aqutsisoqarfiit, inissiaatit ikuallattumi putsumut kalerrisaaruteqarnersut, kalerrisaaruteqannginnersulluunniit nalunaaruteqaqquneqarput. Ilinniartunut inissiani tamani ikuallattumi putsumut kalerrisaarutit ikkussuisitsinissaq matumani siunertarineqarpoq."

3 Kikkut akisussaappat kollegiani isumannaallisaanerup qulakkeernissaa, attartuisut eqqarsaatigalugit (soorlu kollegiami najugallit)?

Akissut: Nakkutilliinissaq, isumannaatsuutitsinissaq, illuutinillu ingerlatsinissaq illunik piginnittut akisussaaffigaat. Namminersorlutik Oqartussat illuutaat eqqarsaatigalugit, matumani assersuutigalugu pisortat illuutaat, ilinniartunullu inissiaataat ilanngullugit, suliaasaqarfiit illuutinik atuisinnaatitaasut, taamaalillutillu ingerlatsinermi akisussaasut tamanna akisussaaffigaat.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Karl Frederik Danielsen